


# *Kipwilo Kyajimbaikwa,*

## *Ku Mtanda*

 Yesu Kilishitu, Mwaana Wanji, kabiji witupa bitu byonse byatutu mwi Kilishitu. Atweba twasata bingi kwi Anweba, Nkambo, mambo amashuko o twapewa kupichila mu Bukitapisho kikatampe kyapelako akyo Yesu kyo apaine kwi atweba pa Kalvali, amba kitubwezhe mu lupwaino lwa lumvwang'ano lwa bupopweshi kabiji ne kutalwa bulongo kwi Anweba, pakuuba mba twikale nalulwe lutekenesho lwa kuyuka amba kyanembwa mba, “Inge waikala mwi Amiwa, ne Byambo Byami byaikala mwi anweba, mwakonsha kwipuzha kyonse kyo mwaswa, kabiji kikemubilwa.” Bino, twasata bingi pa kikye, kabiji twalomba mba Anweba musakwitupa lwitabilo lwa kwikiketekela na byonse biji mwi atweba.

<sup>2</sup> Pano lekai tushe kulubaji, Nkambo, bya kumanama byonse bya mu jino juba, ne byakusakamana bya mu buno bumi, kufumatu ku bakalama bakimye kufika ne kwi kafunga, kyakuuba mba kechi kwikalepo kintu kimo mu milanguluko pa kino kimye ne, bino kana kupembelela, kasa tuteleka na munema pakuuba mba Mupashi Wazhila aambe kwi atweba, pakuuba mba tumwenemo kintu kimo kyawama, kya kwimuyukisha Anweba, kupichila mu kupwila kwetu pamo. Mambo, Nkambo, kine kyokyo twaishila pa jino juba jakaba. Aambai kwi atweba kupichila mu Kyambo Kyenu kyumi, kabiji lekai Kyambo kyumi kitwele mwi atweba kabiji kikale mwi atweba, pakuuba mba twafwainwa kupangwa ne kulengwa, kechi mwaila ntanda ne, kana twikale babena kwalulwa kupichila mu kusangululwa kwa mupashi wetu, ne kuya mu musango wa Mwaana Lesa. Oo, michima yetu izakama umvwe twalanguluka, kabiji ne lusekelo lwayula mu myeo yetu, pa kuyuka mba twakonsha kutelwa mba twi baana babalume ne babakazhi bakwa Lesa. Twaimana konkatu ku mpelo ya Kwiya Kwanji kwabubiji, kabiji byaalo byonse ne bufumu kasa bubena kuzakama mushi ya maulu etu, byonse bintu bya muntanda bibena kupwa, bino kasa twayuka mba juba jimo Aye ukeya kabiji uketutwala mu Bufumu bwanji amo mukabula kwikala mpelo, nangwa, kechi bukasukena ne. Kabiji ne pa kulanguluka mba atweba pano twi—twi bangikazhi bamu Bufumu! Anweba Lesa, sembululai michima yetu ne matwi mu jaleelo, kupichila—kupichila mu Mupashi Wazhila, monka mukomvwewa kwa mu meema a mu Byambo. Mambo twikipuzha mu Jizhina Janji kabiji ne kulukumo Lwanji. Amena.

<sup>3</sup> Nakeba kuleta kwianweba alwe lufunjisho lukeelo luno.

Mambo, Nakufwainwa kwamba pa kintu kyapusanako pacheche inge kwajinga mpwijilo ya lubuko, bino twabijikile mba bitupa byamilombelo bikapanwa pa eiti, kufika ne pa eiti-sate nangwa naini koloko. Kabiji Amiwa... Billy wajikwiya ku nzubo mamineti apitapo acheche kunyuma kabiji wajikumbula mba kafwako nangwa umo ujiko kuno ne, nanchi kechi wajikupana bitupa bya milombelo ne. Nanchi atweba tusakuuba... Nakulangulukanga mba ndete yuwe mutwe, wa kolola kipwilo. Kabiji Nakeba mba ng'ambe pa yuwe mutwe wa: *Kipwilo Kyajimbaikwa, Ku Ntanda*. Nasaka kutangapo bimo pano kufuma mu Buuku wa Mitonyi, kyapitala kyabu 16, kutatwila pa veleeshi wabu 10.

*Kabiji Delila wamwambijile Samisoni amba, Talai, mwankosamika, ne kumbula bya bubela: pano mbuulai, Ne mulomba, kana anweba mwakonsha kukaswa byepi.*

*Ponkapo wamwambijile mba, Inge anweba mwakasa namizhinge yakatataka yo bakyangye kwingijishapo kala, ponkapo Nsakwikala ke wanekena byonka binji bantu bakwabo.*

*Delila kepo ashikwile mizhinge yakatataka ne kumukasayo, ne kwamba mba, Bena Filisitiya baiya pe anweba, Samisoni. Kabiji aba bamubelamijile bajinga mu nzubo ya mukachi. Bino aye wiichibawile mizhinge ne kwiifumyako ku maboko anji nobe tonge.*

*Ponkapo Delila wamwambijile Samisoni, Ne lunotu mubena kunkosamika, ne kumbepa: mbuulai kintu kyo bakonsha kwimukasa. Kepo amubuujile mba, Inge waluka... minyumbwe ya suki sebeni mu mutwe wami, na tonge ye bapikula.*

*Kabiji wiikashile kwingijisha kyo bapikwilako bisapi, ne kumwambila mba, Bena Filisitiya baiya kwi anweba, Samisoni. Kabiji aye wabukile kufuma mutulo, ne kusopolamo kya kupikwilako bisapi ne yoya tonge yapikulwa, ne tonge ye bapikula.*

*Kabiji mwanamukazhi wamwambijile mba, Mwaamba byepi mba, Nakutemwa, bino mu mu muchima wenu kasa mwabula kutemwa? anweba mwajimbaika ke bimye binga bisatu, kabiji kechi... mwambula bulume bwenu bukatampe kobufuma ne; kabiji kechi mwambula bulume bwenu kobufuma ne.*

*Kabiji kyaishile kufikizhiwa kuuba mba, aye byo amukajikizhenga pajuba pajuba na byambo byanji, kabiji ne kumukambizha, kya kuuba mba mweo wanji wakatazhiwe kufika ne kulufu;*

*Kabiji wamubuujile byonse bya kumuchima wanji, kabiji wamwambijile mba, Kukyanye kwiyapo kalezala ku wami mutwe ne; mambo Amiwa naikala*

*Munazili wakwa Lesa kufuma munda mu bamaama: umvwe Amiwa natendwa, kepo bulume bwami bwakonsha kufuma pe amiwa, kabiji Nakonsha kwikala ke wakoka, ne kwikala pamo nobe bakwabo bantu.*

*Kabiji Delila byo amwene mba wamubula byonse bya kumuchima wanji, watumenye na kwita. . . bakulumpe babena Filisitiya, kwaamba mba, Iyai kuno jampelako, mambo aye wamweshwa amiwa muchima wanji yense. Kabiji bakulumpe babena Filisitiya baishile koajinga, kabiji bakebele mali, nangwa baletete mali mu maboko anji.*

*Kabiji wamulengejile kulala pa manungo anji; kabiji waichile mwanamulume, kabiji aye wamwambijile mba amutende milumbwe itanu naibiji ya mu mutwe wanji; kabiji. . . batatwile kumumanyika, ne bulume bwanji bwafumine pe aye.*

*Kepo aambile mba, Bena Filisitiya baiya pe obewa, Samisoni. Kabiji aye wabukile kufuma mutulo, kabiji waambile mba, Amiwa nsakuya byonka byo nguba bimye bikwabo, ne kwipukumuna aye mwine. Kabiji aye kechi wayukile mba NKAMBO aye wafumapo pe aye ne.*

4 Pano Nasaka kutanga, kibaba kya yuwe mutwe, kyatanwa monka mu Buuku wa Lumwekesho, kyapitala kyabu 2, kutatwila pa 21 kufikatu ne pamaveleshi 23.

*Kabiji Namupele kimye kya kulapila bwanji bulalalale; kabiji kechi walapijile ne.*

*Talai, Amiwa kamutaya pa mwanya wanji, ne booba nanji bukende mulumano lukatampe, kanatu balapila ku byubilo byabo.*

*Kabiji Amiwa nkepaya baana banji na lufu; kabiji bipwilo byonse bikayuka mba Amiwa yami palanguzha kebelo ne michima moyatala: kabiji Amiwa kapana kwi anweba bonse monka mwaila mingilo yenu.*

Aye Nkambo a bikepo mapesho Anji pakutanga kwa Kyambo Kyanji.

5 Samisoni, ngubilo ikatampe nobe kipwilo, kyatatwiletu bulongo. Aye watatwiletu mujishinda jawama. Aye watatwiletu, kabiji watelelwe mba mwanamulume kilobo wabulume. Aye watatwiletu, na kwingijila Nkambo, na kulama Byambo Byanji kabiji ne kuuba Mikambizho Yanji. Kabiji akyo kyajingatu pamo nobe kipwilo. Kyatatwiletu bulongo, nobe byo twakonsha kwamba, nobe ng'ambilo ya muntanda, watatwiletu mujishinda jawama. Kyatatwile na kulama Mikambizho yakwa Nkambo. Kabiji kikulutu Samisoni walondejile Nkambo, aye Nkambo wamwingijishe Samisoni.

<sup>6</sup> Mambo, Lesa wakonsha kulama uji yense kabiji wakonsha kwingijisha uji yense wakonsha Kumulondela, mambo ye mwingilo wa Lesa. Bino umvwe twaalulukila kuntu kungi, kufuma kubitu bya kwa Lesa, apo Lesa kechi wakonsha kwitwingijisha kuya palutwe ne. Inge twaendatu bulongo na kulondela Mikambizho ya Lesa, umvwe twaikala mu mabula a Baibolo ne kumupopwela na Kyambo kyanembwa, kumupopwela Aye mu Mupashi kabiji ne mu Bukine bwa Kyambo, apo Lesa wakonsha kwingijisha muntu uji yense. Pakuuba umvwe batolapo kya kwaluluka kuya ku kintu kingi, apo Lesa kechi wakonsha kwingijisha yewa muntu kutwajijila ne.

<sup>7</sup> Nanchi, Samisoni waubile ki—kintu kyamwekanyika bingi patoka kya kwimenako kipwilo kya leelo. Kimye kipwilo byo kyatatwile, Lesa wakonsheshe kwingijisha kipwilo, mambo kipwilo kyaendelenga bingi bulongo nakulonda Mikambizho yakwa Nkambo, kyalamine buchibamambo Bwanji ne malamuna Anji, kabiji kyaubile Mikambizho Yanji yonse. Kabiji Lesa wajinga na kipwilo. Bino kyamweka nobe pajipo bukoke pakachi ka kipwilo.

<sup>8</sup> Vulukai, atweba kechi tuji palwendo lwakukaya bisela ne, pakuuba tuji mukondo. Bantu bavula balangulukatu mba inge baikala Mwinakilishitu akyo kyokyonka kikebewa kubiwa, akyo kyaikajika bintu byonse myaka ne myaka, byo baji Benakilishitu kabiji bintu byonse bikekalatu byanekena. Kechi mwakonsha kwikala nakyokyo mu mutwe wenu ne. Mambo, Amiwa ngikala Mwinakilishitu amba ngikale wakulwa, kulwa bulwi bwawama bwa lwitabilo. Naikele Mwinakilishitu, amba twele mu mulaini wakondo. Atweba twi bashilikale Benakilishitu, kabiji twafwainwa kufunjishiwa kabiji ne kukomeshiwa, ne kuyuka ndwilo yonse ya mulwany, kuyuka mwakwipela bukikizhi, ne kuyuka mwa—mwa kulwila bulwi. Kabiji twakonshatu kuuba kyokyo monka Mupashi Wazhila moakonsha kwikyubila kwi atweba. Atweba kuuba twatola bitubula kyaalo kikwabo pa kuya kukondo ne, milanguluko yabo imo. Pakuuba twakonsha kutola milanguluko yetu atweba bene, monka aye Mupashi Wazhila moakonsha kwitutangijila, kabiji ne ng'anyi milanguluko Yo akonsha kwitupa atweba, mambo Aye ye Mukulumpe wa Bakulumpe bazhita yabena Kilishitu.

<sup>9</sup> Samisoni waubile kyawama, wajinga muntu mukatampe posotu byo atatwile ku, watatwile (twakonsha kwikitela mba) kwikala wa bujimbijimbi, poso byo atatwile kufuma mu mpuzha yanji. Kabiji kipwilo kyailengatu bulongo, kabiji kyajingatu bulongo poso byo batatwile kufuma mu mpuzha yabo. Samisoni watatwile kwendauka na bainetu. Kabiji kechi waendaukilenga na basongwakazhi Benaisalela ne, watatwile kwendauka na basongwakazhi Benafilisitiya.

<sup>10</sup> Kabiji akyo kipashako na kyaubile kipwilo. Kechi kyatatwile kufwalama na bakyo ne, kyatatwile kuya nabula kwitabila kabiji ne kutatula kwendauka nababula kwitabila. Apo ipo potwaubijile kilubo kikatampe, kabiji kyo kimo kilubo kikatampe bingi, ke kimye kipwilo po kyatatwile kuba bintu byabula kuwama ne. Kyatatula kutanwa, nobe Samisoni, na bantu batama.

<sup>11</sup> Samisoni, kimye kyonse kyo ajinga pakachi ka bantu bakwa Lesa, waubilengatu bulongo. Pakuuba byo atatwile kwendauka na bantu batama, popo atainwe mulukatazho.

<sup>12</sup> Kabiji abyoyobyoyo kiji na kipwilo. Kimye kipwilo byo kyalondejiletu na munema kabiji pajuba pajuba na kulondela butangi bwa Mupashi Wazhila, Lesa wibapesheshe, kabiji byakukumya ne biyukilo byalondejile kipwilo. Pano byo kyatatwile kutanwa na bantu batama, na ntanda! Ke kintu kimo kyakila kutama kyo kyaubile, kabiji bintu bitanshi byo kyaubile, kyatatwile kwilenga mubukabungwe, ke kuchibakanya lumvwang'ano lwa bupopweshi na baitabila bakwabo, mambo bamwene mba byaalo bibungizha bungizha. Bino ao Mambo awama akatampe kechi apewa ku kyaalo kimo nangwa bantu bamo ne. Apewa ku “yense wakonsha, mulekai eye,” byaalo byonse, mitundu, ne jimi, kabiji ne bantu. Lesa kechi wasakile mba atweba tubikeko mipaka yalwabano ne.

<sup>13</sup> Pakuuba bantu bakebele kwikala nobe, kupashang'anya, nangwa kulondela bakwabo, kuba nobe abya—abya byubapo ntanda, ne kwamba bintu byo bobapo, kwikala ba kushukwa byonka byo bashukwa abo. Atweba kuuba twashuka kasa tuba byubapo ba panontanda ne. Atweba twakonshatu kwikala bashukwa kana nsatulondelatu malamuna akwa Lesa kabiji ne mashinda Anji akubilamo bintu. Atweba kuuba twaikala ne, kupichila mukulondela ntanda ne. Inge kapanyi wafwaka wauba bingi bulongo mubusulu bwabo kupichila mu televizhonyi, kabiji mabumba a maalwa ne wisiki baunba bingi bulongo mubusulu kupichila mu kwingijisha televizhonyi, akyo kechi kyo kiyukilo kya kuuba mba kipwilo kya konsha kuba bulongo kupichila mu televizhonyi ne. Kuuba bulongo kwa kipwilo kwaikalatu mu kusapwila Mambo awama, a Bulume bwakwa Lesa, kabiji ne kumweshi kwa Mupashi. Atweba kuuba twauba mba mambo televizhonyi waubila *kikananga-ne-kikananga* kapanyi wafwaka ne atwa—atwa tupanyi tukwabo ne! Atweba kechi tujipo na Kinembelo kyakwesakanya na boba bantu ne. Kabiji umvwe atweba twauba kyokyo, twakonsha kundoosa bantu bavula bingi, bino akyo kechi ikyo Lesa kyo apaine kwi atweba mba tube ne. Atweba tulanguluka mba tuji na mishobo yonse, kasa yatumbuka kupita peulu, tubungwe tukatampe, tubena kulenga bintu byalezhima kumweka, amba ako kokuya peulu. Atweba tubena kufwilatu panshi ya mauu etu pajuba pajuba, kwamba mwaila bumupashi! Inge twaimana bakosa

teni-milyoni lukeelo luno, kabiji aye Mupashi Wazhila kasa abula kwikala ku lubaji lwetu, tukoba bulongo kwimana na bakosa teni kasa tuji na Mupashi Wazhila kulubaji lwetu. Atweba kuuba twaesakanya pamo na ntanda ne.

<sup>14</sup> Kabiji kintu kitanshi kimo, kyajinga ke, kipwilo kyatatwile kwibika mu bukabungwe. Kabungwe katanshi kajinga ke kipwilo kya Katolika, kepo ke kipwilo kya bena Luther. Kimye kyo babungizhe mu kipwilo kya Katolika mu kwikyalula ke kabungwe, juba jimo kwajinga kujila, “Bena Filisitiya baiya pe obewa, Samisoni,” kabiji Samisoni wachibawile mizhinge ya fungwa ya kipwilo kya Katolika, kabiji Martin Luther waishile, na kabungwe.

<sup>15</sup> Kepo bakashile kipwilo na muzhinge mukwabo, byonka byaubile Delila. Kabiji batatwile. . . mukifulo kya kwikala na bantu baitwa na-Lesa, bantu baichilwe na Mupashi Wazhila; kape kechi bayukile ne ABC’s wabo ne, bino bayukile Kilishitu. Kepo kipwilo kyaikela ke misango, kabiji kyatatwile kuya mu ng’ambilo ya bamulwila ntanda. Kabiji batatwile kupana ku basapwishi babo “digili wabu dokotala,” muntu yense wakebelenga kwikala ke Dokotala wa Bulesa. Ao wajinga muzhinge mukwabo wa kukasa kipwilo. Bantu baya na kufunda, yense sukuulu wasekesha kulupula bafunda bulongo pakuuba mba bipwilo byabo byaikala ke byakwitota, “Wentu kafunga ke Dokotala wa Bulesa.” Kabiji baubile byepi? Umo weseka kwikala na maana kukila bakwabo. Kyawama, akyo kechi kijipo nakintu kimo ku meso akwa Lesa ne.

<sup>16</sup> Kabiji kechi kikebewa muntu uji yense kweseka kutwala maana anji a pano pantanda ne kumutokesha pa muchima Lesa nao ne. Ke kyabunya ku meso akwa Lesa! Anweba kechi mukatokesha Lesa pa muchima na nkebelo ne maana a pano pantanda ne, mambo “ke bulwanyani na Lesa,” byo byaamba Kinembelo. Aye kuuba wikyuba ne.

<sup>17</sup> Kabiji uji yense wasekesha kwikala na maana onse. Bayuka byakuba kabiji ne byambo bya kwamba, kabiji kikalatu ke ng’ambilo ya bumulwila ntanda mu kifulo kya kumweshwa bulume, Mbila ya Mupashi Wazhila yonka itwela mu muchima wa muntu kabiji ne kutuluka bubi bwanji. Abo bafunjishiwa ng’ambilo ya bumulwila ntanda, kabiji kechi tukeba kyokyo ne. Paulo waambile mba, “Akye Kyambo kyaishile kwi atweba, kechi monkatu ne. . . nangwa, Mambo awama, mu Byambo byonkatu ne, kana kupichila mu Bulume ne kusololwa kwa Mupashi Wazhila.” Akyo kyaletete Mambo awama, na kumweshwa bulume bwa Mupashi Wazhila! Bino bonsebo bantu baya ku sukuulu ne kufunda kwabaya bingi, byo bakonsha kwimana ku meso a bantu, byo bakonsha kwi mwesha abo bene, byo bakonsha kumvwala ne byo bafwainwa kuuba, kechi bakonsha kwingijisha ng’ambilo ingi ne. Pano, akyo kijitu bulongo kana ng’ambilo ya bumulwila ntanda, bino atweba

kechi twiibakulondela byambo bya muntu ne. Paulo waambile mba, “Aa Mambo awama Amiwa o nsapwila kechi aishile byobyo ne, bino Aishile kupichila mu kusangululwa kwa—kwa Mupashi Wazhila ne kumweshwa Bulume.” Kechi kishila mu ng’ambilo yalengwa bulongo ne, pakuuba mba maana enu ekale, nangwa mba luketekelo lwenu lwikale mu maana a muntu. Pakuuba aishile kupichila mukumweshwa Bulume bwa kusanguka kwa Kilishitu. Ao o Mambo awama, “Kumuyuka Aye mu Bulume bwa kusanguka Kwanji.”

<sup>18</sup> Uji yense weseka kulanguluka mba aye wakila kuuba bulongo kukila bakwabo bantu, dinominesheni uji yense. Ba Methodist bakonsha kwamba mba, “Atweba tuji na bantu bayuka kuuba bulongo.” Ba Baptist bakonsha kwamba mba, kabiji ne ba kipwilo kya Kilishitu, kabiji ne bikwabotu, abo bonse, “Atweba, twakila mukuuba bulongo. Atweba, betu—betu bantu, atweba kechi tulekatu muntu uji yense kuya na kusapwila Mambo awama ne.” Bino abo beba-tongolatu. (Anweba Lesa, tubilai lusa!) Kwi-batongolatu; inge abo-batwezhiwa na lufunjisho lwabo lumo, apo popo bebabika mukipwilo. Lesa kechi wakonsha kumukwata nangwa mujishinda jimo ne. Amiwa nkeba muntu umu wakonsha nkusapwila ao yeba-tongola ku Mupashi Wazhila, Lesa ye wamwimika, kechi watongolwa na muntu nangwa na dinominesheni ne.

<sup>19</sup> Maana onse! Baamba mba, “Oo, atweba Twibiyuka byonse,” kabiji bamo kechi bayuka ne bisopelo bitanshi bya Mupashi Wazhila ne. Abo be Kikana.

<sup>20</sup> Kivululako ka buuku kamo kacheche Amiwa konatangile juba jimo ku California, papita nobe myaka teni. Amiwa ne katolele mushitolo wa mabuuku wakala. Nalubamo mwine wamunembele. Kajinga ka buuku ka kacheche ka teni-seti, bino mwajinga maana awama nangwa kamwekelenga nobe kakusekesha kabiji kabujimbijimbi. Bino, Amiwa nataine kuuba mba mwajingapo kintu kimo kyaumvwanikile nga nobe Lesa, kwi amiwa. Kabiji ka jishimikila kamo katatwile nobe bibye. Lukeelo lumo mu kikumbi kikatampe kya banzolo, mwajinga shikombwe wamucheche ao walangulukile mba uji na maana onse afwainwa kuyukanyikwa. Nanchi watumbukile kuya peulu pa kibokoshi kabiji waimbile butondwe bwanji bucheche ku kibokoshi, foolo nangwa bimye faivi, wabwezhezhe panyuma ka mutwe kanji kacheche ne kukoonkola ryakuuba nobe kechi mwakyumvwapo bikoonkola shikombwe ne. Kabiji bakwabo, wakebwile milanguluko yabo, kabiji aye waambile mba, “Bainetu ne bashetu bamukino kikumbi, Amiwa nasaka kwamba kwi anweba lukeelo luno pa lunengezho lumo lwalufunjisho lotwanengezha.” Waambile mba, “Amiwa natambula maana avula bingi kupichila mu kufunda kwami,” wafumishepo magalashi aacheche pa butondwe bwanji. Kabiji aye waambile mba, “Amiwa nafuukula mba atweba

banzolo twakonsha kwiwamisha atweba benu na maana. Onkao mambo, Amiwa nakonsha kwimubula mba kwepi, inge twakonsha kupooya panshi ne kwingila kwingila mu kikumbi kimo nangwatu kimbo, tukatana vitamini umo ao wakonsha kwitulengela kukoonkola bulongo, mayona awama. Kabiji, oo, Nakonsha kwimubula anweba byotwakonsha kwiwamisha atweba bene mu mashinda avula.”

<sup>21</sup> Kabiji atwa tunzolo tucheche na mayona ato achila, twapangile bingi kyongyo kabiji ne kwamba mba, “Bushe kechi wawama nenyi?” Kabiji kine bamukomokele bingi. “Oo, aye ke shikombwe wamaana bingi!” Kyavulula pa bamo baabo basapwishi ba kumasukuulu. “Awa ke muntu wamaana bingi! Kechi kuji ne kine kintu kya kukila nabaabo banzolo bashala, atweba bonse twafwainwa kuyatu nanji.”

<sup>22</sup> Kyawama, awa mulunda mucheche kasa akyangye ne kupwisha kwamba kwanji ne, kwajinga mukwabo nzolo mucheche wabujile kwikala na mayona awama, waishile kasa anyema lubilo kufuma kubakwabo mu lubaza wa bazolo, kabiji waambile mba, “Basongwalume, pa kamineti kamotu! Amiwa nafumatu na kumvwa jashi ja kuwaileshi jakatatakatu. Banzolo mutengo wayako peulu na maseti foolo pa paundi umo, atweba bonse keesha baketwipaya! Pano nga maana enu awama akoba byepi?”

<sup>23</sup> Mulongo, maana onse otwakonsha kwikala nao, ng’anyi buwame bo akonsha kuleta? Atweba twi ndochitu yabaya sikisi-futu! Atweba bonse tubena kufwa na maichezi ne na mamineti. Maana etu kechi ajipo na kilumbululo ne. Atweba twafwainwa kumuyuka Aye. Bino abo booba kyokyo.

<sup>24</sup> Nobe Byonaambilenga kimye kimo kyapita kunyuma pa kang’onyi kamo kacheche, kabiji ako kalangulukile mba kayuka maana onse a—akebewa kuyukanyikwa, kabiji ako kayukile byavula bingi kya kuubamba wakonsha kubuula tonse tung’onyi pa bwikalo bwa bantu. Nanchi ako katumbukile kuya mukisa kyako kabiji ne kutatula kwamba pa bantu, byo ayukile pe abo. Kabiji, ponkapotu, polofesa wafumine ku Purdue waishile kabiji watatwile kwamba byambo byapeulu-byawama kwi aye, kabiji awa mulunda mucheche wakopele jiso janji kabiji waalulwile mutwe wanji ne . . . Bino, ako kajinga na meso, ako kakonsheshe kumona polofesa. Aye wajinga na matwi, wakonsheshe nkumumvwa. Bino, nangwa byonkabyo, aye kechi wayukile ne byo aambilengapo ne. Kika? Aye ujitu na tubongo twakang’onyi. Abwa ke bongo bwa-kang’onyi. Boobonka bo anji nabo. Ako kechi kanjipo na bongo bwa muntu ne, nanchi kuuba walanguluka nobe bantu ne.

<sup>25</sup> Kabiji nangwa muntu kechi wakonsha kulanguluka nobe Lesa ne! Obewa wiimuntu, kabiji ne maana onse apanopantanda kafwako kyo anji ne ajitu pamo nobe bongo bwa kang’onyi.



Byonse byomuuba, mwikozhatu anweba bene. Anweba mwafwainwa kwikala na maana akwa Kilishitu.

<sup>26</sup> Ene mambo bantu kyobaila na kwininga ku tubungwe, kabiji ne kupingakenyapo lwimu mukifulo kya kusemwa kupya, beseka kupitaila pa kusemwa kupya. Abo kechi basaka kusemwa kupya ne. Kabiji abo—abo bayuka mba twikifunjisha kufuma mu Baibolo, nanchi bakebatu kupingakenyamo kintu kingi. Kabiji bantu baki Pentekosito ne abo baji mukilubo, kasa baseka kupingakenyamo kintu kingi! Abo bekisaka ke mwakufunjila. Kyafwainwa kwikalatu ke kyakwifunjisha, “Bakonsha kwi imuna na maboko kabiji batwela ne mukipwilo, kabiji ne kusaswa nangwa kubatizhiwa,” nangwa kintutu kikwabo. Abo baji na moyo wakusemwa kupya. Amiwa kimye kimo naketekela mba ba Branham Tabernacle babena kwikyumvwa moyo!

<sup>27</sup> Pano, atweba bonse twayuka mba kusemwa, Amiwa kechi nasakamana kuntu kwine kwatanwa kyokyo ne, nangwa kwepi, kuji konse kutanwatu busaji. Inge mwaana wasemekelwe pa mushishi wandochi, nangwa panshi, nangwa mulumu wakipatela yebapetamo-kyachiluluka, kujitu busaji, nangwa byonkabyo. Lusemo lwa mwaana ng’ombe, lusemo lwa kintu kiji kyonse, ke busajitu.

<sup>28</sup> Kabiji lusemo lupya kechi kintu kikwabo ne ke busaji! Bino bantu bakosakana bingi, “Atweba tusakuya kokwa kobeimuna mu maboko. Atweba tusakuya kokwa kubabula kufukama ne kujila, kabiji ne kupuma ku kitapisho ne kujila.” Anweba musaka kwikala musango wa bumuntu bwabaya! Kyotusaka ke kusemwa, kufwa kumubiji, akyo kyo kileta Bumi!

<sup>29</sup> Lukunwa, lutamba wakala, lukunwa wa lutamba, mwatola awa lutamba ne kumubika mu mushiji. Posotu mwaikala na tamba yakatataka, awa lutamba wakala wafwainwa kubola. Jitaba kechi jakonsha kulupula bumi bupya ne kana patanshi jakibola.

<sup>30</sup> Kabiji mwanamulume nangwa mwanamukazhi kechi wakonsha kwikala na kusemwa kupya ne poso milanguluko yabo yakufunda ne bumuntu bwabo bwabola, bwafwa, kufwila ku kitapisho, kabiji ne kubijika, waikala ke wabusajitu, kyakuuba mba kukosakana kwafumako kutesheshi, kabiji wasemwa jibiji ku Mupashi wakwa Lesa. Amiwa kechi nasakamana ne nangwa jibingo, kwamba mujimi, watoloka peulu-ne-panshi, ne kupuma kubuyapi nobe nzolo uji na mutwe wanji wasutulwa peulu, obewa ubena kuleta Bumi bupya! Bino atweba twapingakenyemo kintu kingi, atweba tukeba jishinda jakala, kine.

<sup>31</sup> Juba jikwabo, Friday, mukazhi ne Amiwa twailenga ku shitolo. Amiwa kechi natazha mukuba mba kwimbapo pa kikyeye ne. Bino byo twailenga mu mukwakwa, Amiwa ne kainyengatu nakufumyako mutwe, banabakazhi baji mulekese. Amiwa nalaile Lesa kimye kyonajinga muntu mpofu, inge Aye

wakonsha kumbuka meso ami Nkatalangatu pa bintu byawama. Kabiji Amiwa ndama ka musalabo kacheche kasa kapepela mu motoka wami. Umvwe namona bintu byamusango yewa, Amiwa ntalatu ku musalabo ne kwaamba mba, “Anweba Lesa, Akyo kyo Kyakufyamamo kyami,” byo Mona pa musalabo.

<sup>32</sup> Amiwa namwene banabakazhi. Meda waambile mba, “Atweba kechi twamonapo umo mwanamukazhi wamvwala siketi ne.” Kabiji waambile mba, “Bill, mona yewa mwanamukazhi popa uji natutambo tucheche kwiulu ya mubiji waji,” kabiji waambile mba, “anweba mubena kumbula mba awa mwanamukazhi kechi wayuka mba akya kintu kyatama nenyi?” Waambile mba, “Inge kechi wayuka mba kyatama ne, apo kechi uji mubututulu bwalumbulupuka ne.”

<sup>33</sup> Naambile mba, “Mineti umotu, mutemwe. Aye ke mwina America, wauba byonka byubapo bena America.” Naambile mba, “Amiwa najinga mu Finland kechi papitapo kimye kyabaya ne, mutemwe.”

<sup>34</sup> Kabiji Amiwa naipwizhe kokwa ku mwanamulume wangikajikile panshi, Dokotala Manninen. Kabiji twailenga ku—ku ngowelo ya bututulu bwa mubiji, kitelwa mba “sauna,” kabiji bakutwala mukachi ne kukwichila meema akaba, nangwa meema pa mabwe akaba, kabiji kyakulengela kusulwila. Pankapo bakulengela watolokela mu meema a aishi, kabiji wafumamo. Nanchi bakutwala mulumu, kabiji amwa muji ba manase, banabakazhi bakwanya banabalume (bino kasa baji mulekese), bebatuma jibiji mu kizhiba. Amiwa kechi nakonsha kuyamo ne. Kabiji Naambile mba, “Dokotala Manninen, kika kyalubakana.”

<sup>35</sup> Aye waambile mba, “Kijitu bulongo nanchi, Reverend Branham, akye kyatama. Pano nga madokotala benu bena America bakonsha kumvula mwanamukazhi washalatu mulekese ne kumulajika pa tebulu, ne kupima kibese kyonse kya bwanabukazhi—kibese kyonse kya bwanabukazhi kyo anji nakyu? Pano nga bamanase benu mu bipatela?”

<sup>36</sup> Naambile mba, “Ndekeleko mambo, Mulongo Manninen, Manninen, ujitu bulongo.”

<sup>37</sup> Kyokika? Ke kisho. Kimye kyo Najinga mu Paris Amiwa kechi nakonsheshe kwikiketekela ne, amba bisukwilo byabonse banabalume ne banabakazhi bijitu pamo. Amiwa kechi ne kyumvwine ne, kyakuuba mba malumu mwakukokolokela ajinga kulubaji lwa mukwakwa abonse bashetu ne bainetu. Amiwa kechi nakonsheshe kuketekela mba banabakazhi baya kukitulu na kowa, songwalume na mutemwe waji, kechi baji na malumu mwakumvwajila ne, abo bamvulatu byakumvwala byabo byonse kufika ne kukyapelako, nanchi bavundaminako manyuma abo kabiji bamvwala kakisapi kacheche palwiso

kebaye nakowa, bino byokiji. Abo kechi batako ne muchima ne. Ke kisho kya mu France.

<sup>38</sup> Mu Africa, banabakazhi ne banabalume, banyike ne bakulumpe, kwakubula ne byakumvwala ne, kwenda kupita mu majimi. Abo kechi bayukapo ne malumu mwakukokolokelane, nangwa bintutu, nangwa kechi bakifumako kulubaji lwa mukwabo ne. Bino kechi bayukapo na lupusano ne. Abo kechi bayuka nelupusano. Pakuuba ke bisho bya byaalo.

<sup>39</sup> Bino Naambile mba, “Mutemwe, atweba twapusanako, twafuma ku Kyaalo kikwabo. Atweba twibenyi kabiji bakang’enda kuno, akyo kyo kilengelela bintu kumweka byatama bingi. Mambo Baibolo waamba mba, ‘Aba bamba byobyoyo, betongola bene, bamweshwa kuuba mba bakang’enda kabiji benyi, abo babena kukeba muzhi ubena kwiya.’”

<sup>40</sup> Mwanamulume nangwa mwanamukazhi mu Italy, mu France, mu Africa, mu kyaalo kiji kyonse, ao wasemekwa jibiji na Mupashi Wazhila, kechi uba bibye bintu ne. Abo kechi bakonsha kumvwala abya byakumvwala ne. Abo kechi bakonsha kuubila mujoja jishinda ne, mambo abo ke ba Mukyaalo kikwabo Amo Tangi ne Tungi ye Lesa. Atweba twafuma Mwiulu. Aye mupashi uji mwi anweba, ye utundaika bumi bwenu. Inge obewa wiimwina America, ukooba byonka byubapo bena America. Inge obewa wiimwina France, obewa ukoba byonka byubapo bena France, kabiji ukajimbulula mukwenu. Pakuuba inge wiwakwa Lesa, obewa ukoba byonka byo bobapo Mwiulu, mambo Mupashi obe wafuma Kwiulu kabiji Ye ukutangijila.

<sup>41</sup> Kintu kicheche kyonmwakonsha kutalapo. Mu Kinembelo, bonse bakebelenga yuwe Muzhi, bajinga nangubilo yapusanako. Abo bashimwine mba bakang’enda ne benyi. Bino kulubaji lwa kwa Kaina, bajinga batupondo kabiji ke babula pa kwikala. Pakuuba Benakilishitu bajinga bakang’enda ne benyi. Kapondo kechi uji na nzubo ne, unyema mambo ke muntu wakila mu kutama. Pakuuba kang’enda ke kintu kitutulu, kabiji kufuma ku ntanda yakine mu Kyaalo kikwabo, kasa abena kuya na kukeba Muzhi, kasa ashimuna kupichila mungikelo yanji amba ujipo nakintu kimo kya ku Kyaalo kikwabo. Ao oene mambo.

<sup>42</sup> Bino nangwa byonkabyo bantu booba byobyoyo, bantu bamvwala byobyoyo bintu, lekai ne mubuule. Mu South Africa, byo Namwene sate sauzande batushi, baji mulekese, bemvweta myemba. Sikisitiin-, eitiin-, basongwakazhi-bamyaka-tweti, basongwalume babulapo nangwa kachechetu kakumvwala ne, kasa baimana byobyoyo na mateshi mu bilungi byabo, kabiji kasa bepeta, bikupa byapita mu myona yabo, kabiji ne mapingo akoobama ku matwi abo, kabiji bakilang’anya bikupa byabantu nangwa bikupa bimo musuki yabo, meno abanyama ebakobama, bajitu mulekese nobe byonka byo baishile mutanda, kabiji kechi bekiyukile ne. Pakuuba byo batambwile Kilishitu, kabiji

bapona kikuvumene ne kutambula Mupashi Wazhila, baimene ne kuvunga maboko abo ne kumvweta pa buvu bwabo, byo bafuminengako kuya nakukeba byakuvwala bya kumvwala. Kika? Baikala ke bakang'enda ne benyi ku inontanda. Aleluya! Bafumineko kwi Aye. Ee, mwane.

<sup>43</sup> Oo, ee, aabo bantu betela abo bene mba Benakilishitu. Abo batanwa mu bipwilo. Abo baya nakwamba mba, "Atweba twi ba Methodist. Atweba twi ba Baptist. Atweba twi ba Pentekosito. Atweba twi ba Seventh-day Adventist. Atweba twi *bibye*, *byobya*, nangwa twi *bakwabo*." Akyo kechi kijipo na kintu kimo pakyokyo ne. Wenu mupashi, bumi buji mwi obewa, butundaika ne kukubula byouji. Yesu waambile mba, "Konka kubipangwa byabo koko mukebayukila."

<sup>44</sup> Kipwilo kyaikalatu pamo byonka byajinga Isalela, patanshi. Bamwene byaalo byabatushi kasa baji na mfumu. Lesa wajinga Mfumu wabo. Kabiji bamwene byaalo bya batushi kasa baji na mfumu, nanchi kebakebe kubilapamo na byaalo bya batushi, kabiji bepotejile abo bene mfumu. Kabiji byo bekyubiletu, batwelele mulukatazho. Bitende bitende kyatatwile kutwelamo. Bitende bitende ntanda yatatwile kutwela mukachi kabo. Poso pakupezhako kwaiya Ahaba. Umo mfumu wafwenyenyenga pepi, pacheche pacheche kwipi, kabiji pa kupezhako bumi bonse bwafuminemo mwi abo. Kabiji byobyo baikela. Kabiji Mfumu mwine byo aishile, abo kechi Bamuyukile ne.

<sup>45</sup> Akyo kyo kintu kimo kipwilo byo kyauba. Kyaalulwatu. Abye byobyo kiji. Kyaalulwa ke bumulwila ntanda, byamasukuulu. Ke byaalulwa ke bipamo, tubungwe, bipwilo bikatampe, ke basapwishi babwitote. Kabiji mwine Mfumu inge waiya, abo kechi Bamuyaka ne, kabiji ke kupopa pakinchi yeka Mupashi Wazhila ao uji ye Mfumu wabo. Abo kechi Bamuyaka ne, bino Aye bamuseka kabiji Aye ne kumwendeleka. Byonka Bayudeya byo baubile Mesiyasa wabo, kipwilo ne akyo byo kibena kuuba Mesiyasa wabo mu musango umo. Abo kechi bekiyuka ne. Abo kechi bajipo na meso abumupashi ne, mambo abo batwezhiwa bingi-mubyanembwa na meso abo kabiji ne byobya byo hamona, bishimikwa bikatampe, kasa besakanya pamo na ntanda. Atweba kechi twafunjishiwa—twafunjishiwa kwesakanya pamo nantanda ne. Atweba twafunjishiwa kwikepesha atweba bene.

<sup>46</sup> Kabiji, umo ke bavula, mwi Lesa. Kabiji buleelo mu busapwishi bwalubuko mu mantanda, muji bingi kwikyombesha, bakwikyombesha nabo. Umo waamba mba, "Kyawama, Lesa apeshiwe, Amiwa njina sauzande wavula. Amiwa njina mbung'eno yabaya kukila yo uji nayo." Ng'anyi lupusano lwikalapo? Atweba tuji naumo nangwa milyoni umo, ng'anyi lupusano lwikalapo? Atweba twaikala ba kishika kwi Lesa? Atweba twi bakishika ku Kyambo Kyanji? Bushe twimana

kasa twesekwa ku Mupashi Wazhila? Bushe kyakine nyi? Akyo kyokine kintu.

<sup>47</sup> Bino atweba tunekenya Baibolo. Bavula bingi bantu baki Pentekosito, baji na Lufunjisho lwawama lwa yuwe Baibolo, kwikala kunekenya. Kuji...Amiwa kechi mbena kukeba kukozhang'anya milanguluko ne. Amiwa nji mu kipwilo kyami, kabiji Amiwa njina ng'umvwino Na—Nakonsha kuuba kika, mu kipwilo kyami, mambo Mbena kusapwila Mamboawama. Bino kuji mateni amasauzande abasapwishi baki Pentekosito bayuka mba kechi kujipo ne kyokyo kintu mu Baibilo kyakubatzha mu jizhina ja "Taata, Mwaana, Mupashi Wazhila ne." Amiwa nakambizha archbishopu, nangwa muntu uji yense, nkumweshwa ako muntu uji yense ao wabatzhiwe mu jizhina ja "Taata, Mwaana, Mupashi Wazhila." Bino abo bebinekenya, mambo atwa tubungwe totwauba kyokyo. Kechi kujipo muntu umo mu Lulayang'ano Lupya, kabiji ne pa myaka fiili aduleendi kuya kulutwe, mwaila jishimikila, kanatu bonka babatzihiwe mu Jizhina ja Yesu Kilishitu. Kyokika? Kabungwe. Ko kekyubile. Kunekenya bintu!

<sup>48</sup> Kabiji buleelo bafumyamo bamingilo ba mu mikwakwa. Bafumyamo musakai mu kipwilo. Bafumyamo lukumo lonse mu kipwilo, kabiji batwezhamo sapwilo ya masukuulu, sapwilo ya kashikombwe-kabutodwe kakala, byonse byo banengezha bulongo mumpuzha, kabiji ne banabakazhi babo kasa bamvwala tuputula ne madeleshi akwata ku mubiji, kabiji ne banabalume kupepa tusanga, kabiji bateya ngyuka ne kwamba bisela byatama. Ke kyabuvu ku meso akwa Lesa! Amiwa nayuka mba akyo kyakosa, bino ke kimye kyakuuba mba muntu umo wakonsha kwambapo kintu kimo. Kunekenya bintu, kuswisha, kasa booba nobe bamuntanda!

<sup>49</sup> Amiwa kechi natako muchima ne inge kyalumbulula mba Amiwa nkashala bunke, kwakubula muntu nangwa umo ne kanatu yeka Lesa, Amiwa kasapwila Bukine bwa Baibolo bwakwa Lesa kabiji ne kwimana Nabo. Inge Nafwa, Amiwa nkemana na Bukine. Kyakine. Twakeba Bukine. Amiwa kechi kampimwa mwaila kipwilo ne, bino kana monka mwaila Kyambo kya Lesa mo monka mo Nakonsha kumpiminwa.

<sup>50</sup> Pakuuba Delila, bushe mwamona nyi? Aye wayukile mba Samisoni uji na bulume. Kabiji aye kechi wayukile pajinga bobo bulume ne. Aye kechi wakonsheshe kubulang'ana abwa bulume byo bwajinga ne, bino kwajinga bulume bukatampe abo Samisoni boajinga nabo, kabiji wakebelenga kuyuka. Kabiji, nobe Delila, watwajijile na kongola Samisoni na buya bwanji. Oo, aye wamvwalanga vwajilo yabulalalale. Kabiji waendelenga ku meso anji kabiji naku-mukoka nobe bamo baki-twala bamujoja juba, kabiji—kabiji ne bikwabotu, kabiji ne kukeba kuuba nobe kintutu kikwabo, na kwendamulekese, nakweseka kumongola Samisoni.

51 Akyo kyo kintu kimo kyaubapo ntanda ku kipwilo. Pano nga Bulume bobo bukatampe bujipi?

52 “Kyawama, inge twakonsha kwikala bukabungwe, akyo kikachibakanya Bulume.” Akyo kipwilo kya Katolika kikyubile.

53 “Pakuuba bena Filisitiya baiya peobewa, Samisoni.” Kabiji Luther walupukilemo.

54 Nanchi babwela be bungizha jibiji. “Inge mwakonsha kukasa na muzhinge mukwabo, usa kukwata.” Nanchi bekyubile.

55 “Kabiji bena Filisitiya baiya peobewa, Samisoni.” Kika kyamwekele? Wesley walupukilemo ne kuchibaula mizhinge.

56 “Pano wajimbaika pa kimye kyabaya. Kechi wayuka mba Amiwa nakutemwa ne, Samisoni? Kijitu bulongo, mbuule bukine buji mu muchima obe.”

“Kijitu bulongo, mukase na muzhinge mukwabo.”

57 “Kijitu bulongo, pano tusakuba kyokyo.” Kyokika? Awa ye muzhinge wabundinominesheni.

58 “Ndeke ngikale wakasuluka, amba Amiwa kechi njipo na dinominesheni ne. Nanchi, Amiwa nsakukubuula, usa kuchibakanya.” Nanchi mwalupukile ba Pentekosito. Nga Bulume bobo bujipi?

“Benafilisitiya baiya peobewa.” Kabiji wachibawile mizhinge ne jikwabo.

59 Pano kika kyamwekele? Kiji na ba Pentekosito, Madokotala akatampe Abulesa ku bakafunga babo, muntu umo mukatampe. Bajitu pamo na masukuulu ne byakisho nobe ba Methodist nangwa ba Baptist, nangwa bonse bashala byobaji nabyo. Yai mu kipwilo kabiji kechi mwakonsha kumvwapo “amena ne,” mujitu mwatalala nobe jibumba ja ma Eskimo baji kulubaji lwa Kabeta ka Buyeke. Munyango! Bapusanakotu! “Kabiji pano bena Filisitiya baiya pe obewa, Samisoni.”

60 Bena Filisitiya baiya pe obewa, America. Ngaabwa bu umo bwa mupashi bujipi? Ngaabwa bu umo bwa Pentekositi bujipi? Ba Assemblies of God, ne ba United, kabiji ne ba kipwilo kya Lesa, ne *bibye*, *byobya*, ne *bikwabo*, kila umo nandonda yapusanako, awe na *kyokya*, kabiji awe na *kyokya*. Twachibaulwa bingi poso inge waya mu muzhi umo napwijilo ya kusangululwa, inge kipwilo kimo kyakulipilila, bashala kechi bakonsha ne kutanwako ne. Ba Komunizimu baji pe obewa, America.

61 Kwepi kuji Bulume bwetu? Kwepi kuji lukumo lwetu? Kyokika? Mambo twalondejileko maana a muntu mukifulo kya Bulume bwakwa Lesa! Kika, baji na basapwishi betu kabiji bintu byakosa bingi ne kukosakana, kyakuuba mba betwalula ke kabungwe kufika ku kipimo kya kukosakana

ne kukosa mashingo, poso bantu... Bushe mukyumvwapo kubijika mu kipwilo ne jikwabo? Anweba kechi mwakonsha kumvwapo uji yense kujila ne. Kipona kya bajila bekibika mu lumu wakunyuma. Kechi mukijipo lukumo mu kipwilo ne. Kyotuubatu ke kwikalatu kasa twakosakana. Kasa twabula kwikala bakasuluka. Twakaswa. Aye diabola, na bademona banji bakatataka, wakasa kipwilo kya Lesa mumi. Abyo ibyo. Kechi mukijipo Bulume mu kipwilo ne. Kechi mujipo kukasuluka ne. Bantu baji bingi bakosakana kabiji bakosa! Kika, Lesa kechi wakonsha kwiya mukachi ka bantu ba ki Pentekosito, ne kumweshwa mba Aye ye Lesa, kabiji ne kushiniikisha biyukilo Byanji bya lusanguko, kechi kibasukenya ne. Lukumo! Kika, ke kyabuvu! Amiwa ng'enda mwaya kyaalo, Lesa na kwingila, na kuba biyukilo, kabiji bantu kasa baikalatu, kabiji, "Kyawama, Amiwa nalanguluka mba byonse bijitu bulongo. Oo, Nayuka mba kyakonsha kubiwa." Kechi kibasukenya ne! Kika? Bakaswa na Delila, yo ntanda. Baji mu fungwa.

<sup>62</sup> Pano bebatwezha monka, bakaswa mu kije kyabupopweshi. "Bena Filisitiya baji pe obewa, Samisoni." Usakubapo byepi pa kikye?

<sup>63</sup> "Oo, atweba tuji na dinominesheni mukatampe." Kine. "Atweba tuji na bamembala bavula kukila ne kunyuma byotwajinga." Pukuuba Mupashi ujipi? Kwepi kuji Mupashi Wazhila?

<sup>64</sup> Abyo byo byauba diabola. Wikyongwela mu kipwilo. Watwajijilatu na kongola kipwilo, "Iyai kwi amiwa, Amiwa nsakwimupa mukatampe wabaya tabbanako kuno inge mwakonsha kuuba *kikye*. Inge mwakonsha kufumyamo yewa musapwishi wibikosesha ye mujinanji, ne kumona mwanamulume, Dokotala wa Bulesa uji na milanguluko, atweba tukashimika kipwilo kyawama kikatampe kabiji ne atweba tukekala pamo nabonse." Kimulenge buvu anweba! Kyawama kwikala na muntu wabula kuyuka kwabanya kofi ku nkunde, bino kasa ayulamo na Mupashi Wazhila, ao ubula kunekenya bintu, kupichila mu Bulume bwa Lesa.

<sup>65</sup> Pakuuba kyafika pakifulo kyakuba mba, oo, kyakosakana bingi, poso umo kamulanda wazhila watwela mu mpwijilo yabo kabiji waamba nemujimi, nangwa kubijika pacheche, nangwa waubapo kintu kimo, kabiji bashala bonse bakonsha kuzhokoloka ne kumutala. "Kyajinga kika? Kyawama, nakumya kika? Ao wafwainwa kwikala ke muntu walupata watwelamuno." Anweba mwayuka mba akye kyabukine! Umo kamulanda wazhila watwela mukachi, waumvwa bingi lusekelo kyakuba mba wasutulako maboko abo, kabiji wajila ne kutota Nkambo, muntu umo wakonsha kubijika mba "amena" ku kusapwila kwa Mamboawama, kabiji bashala babwela baaluluka mba bamone byo aamba. Abyo keebya bu Pentekosito.

Lukatazho lweepi? Anweba mubena kulondela ba Methodist, kulondela ba Baptist; babena kulondela ba Katolika; Katolika ubena kulondela ngehena. Kabiji, bonse pamo, kekulondelatu ngehena! Ibyo.

<sup>66</sup> Delila wiimongwela mu bipwilo bikatampe, byawama, basapwishi bafunda, kusenda lubaji lwa bapeulu. “Kyawama, mwayukatu, *Kananga-ne-kananga* kufika ne kuuji na mamilyoni, inge twakonsha kumuleta mu kipwilo kyetu! Oo, ami!” Inge kechi wasemwa jibiji ne, nanchi kechi wafikilamo kwikala popa ne. Amiwa kechi natakochi muchima ne nangwa uji na madola mamilyoni. Inge uji na ma Cadillac foote, byonse byo anji nabyo, aye wafwainwa kusemwa jibiji, kwiya kufika ne ku kusemwa kupya kabiji ne kusangululwa ku Mupashi Wazhila, kabiji ne kulupukamo na kusemwa kupya, na kufyona mamina (ndekelaiko mambo), ubena-kujila kabiji ne kubijika, kabiji ne kuba byonka byuba bonse, kabiji ne kwikala bumi palutwe kushinikisha amba uji Nakyo. Amena. Akyo kyo kikebewa.

<sup>67</sup> “Samisoni, bena Filisitiya baiya pe obewa.” Ba Komunizimu baji pe obewa. Ntanda iji pe obewa. Diabola uji pe obewa.

<sup>68</sup> Babwela kabiji ba mona Mupashi wakwa Lesa kasa oba byakukumya ne kuuba bintu bya lusanguko Lwanji, Yesu byo alaile, baamba mba, “Mwayuka, Nalanguluka mba Mulongo Branham ulajika bingi bantu tulo. Kafunga wami waambile mba byakwa diabola.”

<sup>69</sup> Obewa kamulanda, wabukafutufutu, mutushi wabula bukishika, ye bawamishatu, obewa musuka mu kiseba kya mukoko! Yesu waambile mba, “Inge anweba mwajikungyuka Ami, inge juba Jami mwijiyukile.” Pakuuba anweba muji na jibumba ja ba Saulo jikeba kwimwalula nobe byubapo bonse ba muntanda.

<sup>70</sup> Tubena kukeba jibumba ja bantu bakwa Lesa abo babula kunekenya bintu pa Kyambo, pakuuba basapwila Bukine kabiji ne kwimana pa lubatizhilo lwa Mupashi Wazhila.

<sup>71</sup> Pakuuba ntanda yauba ka? Yatenda Bulume bobo bonse. Obewa wasemekelwe Munazili, Pentekositi, pakuuba ntanda kine yatenda Bulume bobo bonse. Pano ke kyakosakanatu pamo nabonse bashala.

<sup>72</sup> Kika kyo tusakuba? Kika kisakumweka? Kuji kintu kimo kya lukumo kyo Nakonsha kulanguluka kufika ku mpelo ya kibaba.

<sup>73</sup> Kimye Samisoni kyo akashilwe! Kechi twakonsha kwikala na kusangululwa ne. Telekai ku mulongo wetu wakishika, Billy Graham, “Kusangululwa mu juba jetu!” Telekai kwi Oral Roberts kubijika mba, “Kusangululwa mu juba jetu!” Telekai ku bonse bashala, “Kusangululwa mu juba jetu!” Twakonsha kwikala byepi na kusangululwa kasa twakaswa? Atweba twakasa Mupashi Wazhila, na tubungwe twetu ne bisho,



kabiji kechi twakonsha kwikala na kusangululwa kwa Mupashi Wazhila ne. Amena. Amiwa nayuka mba akyo kyakaba bingi, na lubesha, bino bo Bukine. Mwakonsha kwikala byepi na kusangululwa kwa Mupashi Wazhila kasa mwakaswa kabiji ne kukosakana! “Musango wa kibwina lesa,” Baibolo waamba mba byobakekala. “Musango wabwina lesa, bino kebakane Bulume bwao.” Bulume bwabyepi? Bulume bwa kabungwe? Bulume bwa ntanda? Bulume bwa kipwilo? Abwa Bulume bwa Mupashi Wazhila! Akyo kyo kifulo kyafimika kya mu kipwilo. Kabiji umvwe kipwilo kyasenda basapwishi bafunda, kabiji ne bishimikwa bikatampe ne byakila kuwama, mukifulo kya yewamusango wakala wa Mupashi Wazhila, bakonsha ne kutemwa kwikala mu mishonyi jibiji. Amena. Kine. Mwakonsha kwikala byepi na kusangululwa kwa Mupashi Wazhila, kabiji bantu kasa babena Kumuzhimya kabiji Bamukasa kabiji baji Nanji namoyo? Apo popaji lukatazho.

<sup>74</sup> “Bena Filisitiya baiya pe obewa.” Pakuuba kuji luketekelo lumo lwapeshiwa lotuji nalo, kimye Samisoni kyo ajinga mukaleya. . .

<sup>75</sup> Ng’anyi kintu kitanshi kyo baubile byo bamukwachile? Bamukashile, patanshi. Basendele bulume bwanji, batulukile kyafyamika kyanji. Batulukile kyafyamika kyobe. Ntanda yatulukile kyabufyafya kyobe. Pano anweba banabakazhi bonse mwichika suki yenu, ijitu nobe ba muntanda. Anweba banabalume bonse muya kabiji ke mukobe byubilo nobe ntanda. Kijitu bulongo, kwamba bisela kabiji ne bisela byatama, kabiji ne kuya na kupepa mishanga icheche, kabiji ne kwenda na banabakazhi bamuka bomwalamakana nabo, kabiji bintu byonse muyekawa musango, ntomeno icheche yakisanga jimbwe mu kulama kinto yobe. Amiwa kyawama kulala nazala kabiji ne kuja tubashinkwa twakosakana ne kutoma meema a kumusapi, ne kwikala watoka kabiji wabula biko kumeso akwa Lesa, kukila kunekenya bintu na mambo akito iji yonse. Abyo ibyo. Kine. Kwikala wakine kwi Lesa.

<sup>76</sup> “Samisoni, bena Filisitiya baji pe obewa.” Branham Tabernacle, ngubilo-ya ntanda ibena kwimutwelelela. Pano ngaakyo? Bushe mwasolola kyafyamika kyenu nyi? Bushe mwasolola akya kyafyamika Lesa kyo emupele mukimye kyo mwaalang’ananga mu maloba myaka yapitapo icheche nyi? Bushe mwaleka kyafumamo na ngubilo ya muntanda, bupopweshi bwakokelela? Kika kimumwekela? Lesa wakonsha kwikala panshi ne kuuba kyakukumya kabiji ne kupita monka mujibumba ne kubulang’ana byafyamika bya mu michima yabo, kabiji ne bintu byonse, kabiji ne kubuka bakolwa ne bamanama, kabiji ne kuuba biyukilo ne byakukumya, kabiji ne kusapwila Kyambo Kyanji nangovu yonse, na Mupashi Wazhila; kabiji bantu baamba mba, “Kyawama, Nalanguluka mba kijitu bulongo. Atweba tumvwa bulongo kutelekako kukyokyo pa

kimye, inge kechi twakokeshwa ne.” Ao ye Branham Tabernacle. Bena Filisitiya baiya pe obewa.

<sup>77</sup> Kimye, kyaubiwanga pa kusapwila Kyambo, kabiji ne bazhila bakala na mipolo mu meso abo, bakonshanga kwimana ne kwendauka, kasa bajila, kape kwakubula kwamba ne kyambo ne, kwendaukatu nakuzhokoloka, bibiji nangwa bimye bisatu, kabiji waikala panshi, wayula bingi na Mupashi Wazhila! Akyo Kyambo kibajishishenga! “Muntu kechi ukekela kukajo konka ne, kana kupichila ku Kyambo kyonse kifuma mukanwa kakwa Lesa.” Benafilisitiya baji pe obewa, Branham Tabernacle.

Benafilisitiya baji pe obewa, Pentekosito.

<sup>78</sup> Mambo, bena Filisitiya bakutana, anweba mwashala, myaka yapita kunyuma kimye kyomwialwilwe ke bukabungwe kenekene, kafwako nangwa kimo kyatwelangamo ne kana wii Presbyterian, Baptist, Methodist, Katolika, nangwa kintu kimo. Anweba kechi mwaikalanga na kintu kyakuba na bashala ne.

<sup>79</sup> Nanchi, kusangululwa mujuba jetu? Twakonsha kwikala nako byepi inge awa upana-kusangululwa kimye kyonse wakaswa ku ntanda? Lesa kechi wakonsha kwiya paji ntanda ne, anweba mwakonsha kukoselatu mu kyokyo. Anweba mukwatakana na ntanda, nanchi ke—ke kyonsetu. Inge mwaleka ntanda yimutwelelela, anweba mwatatula kuuba nobe ntanda, nanchi anweba mwapwa kito. Pakuuba umvwe mwichibako kufungwa yonse ya nantanda, kabiji iyai kwi Lesa, Lesa ukemwingijisha posotu anweba mwabwela kubyubilo byabulalelale jibiji.

<sup>80</sup> Luno loloka luketekelelo lo Njinalo lukeelo luno, kyakupezhako Mbila yami, ke kikye, “Mukimye Samisoni kyo akashilwe, suki ipya yatatwile kukoma.”

<sup>81</sup> Lesa tuntuminai Kipwilo kikwabo mpelo yantanda kasa ikyangye kwiya, kyakuuba mba Bulume bwa Mupashi Wazhila bwakonsha kwiya pe akyo, mu kumwesa ng’ingijilo ya Mupashi, kabiji Mako 16 wakonsha kulondela Kipwilo, Byubilo 2:4, Byubilo 2:38, byonsetu bikalondelanga Kipwilo. Biyukilo ne byakukuma bikebalondelanga batumwa. Bikatampe biyukilo bya lusanguko Lwanji bikebalondelanga. Mu kimye kyotuji mukaleya, kine Lesa ubena kukomesha kijimwa kutu kukwabo, mu kwipayang’ana kwapelako. Kapepo kyakonsha kwikala anweba, mulunda nami Mwinakilishitu kuno lukeelo luno, lekai ikale bulume bobbe bwatatula kukoma. Nalomba mba ino Mbila lukeelo luno, kabiji ne mu mantanda monse mukafika kikye, Amiwa naketekela mba aye Mbila isakwimukwasha kupana vitamena ku nyingijilo yenu akyo kikakomesha Bulume bwa bumupashi kubwela mu bumi bwenu jibiji.

Twayai tukunyike mitwe yetu tulombe.

<sup>82</sup> Anweba Nkambo Lesa, Mulenga wa Meulu ne ntanda, Nsulo ya Bumi bwa Myaka ne myaka, kabiji Yeupana kyabupe kyonse

kyawama ne kya bumupashi, tolai bibye byambo lukeelo luno ne kwibibika mu muchima, kabiji ne kwibitekezha, Nkambo. Lekai bantu balombebele pa bibye bintu, byo kyamweka mba ntanda yaongola kipwilo kabiji mu kupezhako Bulume bwakyo bwatulukwa, kifulo kyafyamika kyatanwa, patanwa paji kyafyamika, kabiji ne kwibitenda byonse. Yasenda bantu bonka babijika lujishilo, kimye kimo bajinga nalushijilo, kabiji bebangata byonsetu, kwikala pa manzubo bufuku Pakisatu nakutamba mitachi ya televizhonyi. Bebangata lusekelo kufuma mu michima yabo, ne kwibapa butemwe bwa panopantanda kukila byo batemwa Lesa. Wibapa ntanda yabaya, mu byamuntanda, kilaka kyabaya kya byakukaya bya muntanda kukila kusapwila Mamboawama. Inge kechi kuji jibumba jikatampe ja bakwimba ne kabiji ne bikwabotu byavula, kabiji byakisangajimbwe ne byakutwajijila, nanchi abo kechi bakeba Mamboawama akala ne, kutwajijila, aa aleta mipolo ya lusekelo mumweo, ao abwezha lubuko lwa Bulesa, ao abwezha byabupe bya butumwa mu kipwilo, ao aleta Kilishitu wasanguka, ye Mesiyasa wa jino juba.

<sup>83</sup> Bino byonka Isalela byo akashilwe na—na ba mamfumu babo, kyakuuba mba kechi balondejile mwine Mfumu ne; kabiji mwine Mfumu, Aye byo aishile, kechi Bamuyukile ne. Nanchi byobyoyo kiji leelo. Anweba Nkambo, Mfumu wa Lukumo wamweka mumusango wa Mupashi Wazhila, kabiji, Nkambo, abo kechi bekiyuka ne. Abo kechi bekituluka ne. Abo baji bingi mu bukabungwe kyakosa, kyakuuba mba kechi bekikwatakanya ne, mambo kechi kiji mu kabungwe kabo ne. Nkambo, awe ke mwingilo wa diabola wauba kikyeye ku bantu.

<sup>84</sup> Lekai Samisoni wakwa Lesa, lekai ba bukine mu muchima, abo babena kukabila ne kujila, kabiji babena kusashijila ne kukwachijila, lekai bekale nakyo, Nkambo, poso awe lukunwa wakatataka wakoma, poso kwaiya jibiji lusekelo mu Ziona, kabiji kwaiya jibumba jakonsha kutuluka ne kukwatakanya, ajo jakonsha kumona Mesiyasa kabiji ne Bulume bwafyamika kufuma ku ntanda, kyakuuba mba kechi bakonsha kukwatakanya pakino kimye ne. Swishai, Nkambo, amba bakonshe kumona kikyeye. Mambo twaipuzha bino Mujizhina ja Yesu. Amena.

[Kafwapo bijipo pa tepu ne—Waku.]

. . . Bulume ponka pano,  
Anweba Nkambo, tumai Bulume ponka pano  
Ne kubatizha muntu yense.

Bajinga mu nzubo ya peulu,  
Bajingatu na muchima umo,  
Kimye Mupashi Wazhila kyo aishile  
Ao walailwe na Nkambo yetu.

Anweba Nkambo, tumai Bulume Bwenu ponka  
 pano,  
 Anweba Nkambo, tumai Bulume Bwenu ponka  
 pano;  
 Anweba Nkambo, tumai Bulume ponka pano  
 Ne kubatizha muntu yense.

<sup>85</sup> Byo Namutemwa Aye! Tumaitu Bulume Bwanji! Bajinga pa nzubo ya peulu, bonse na muchima umo. Yonse ntanda yafuminemo mwi abo. Bajinga bakasuluka, ne Mupashi Wazhila waishile.

<sup>86</sup> Leelo baamba mba, “Iyai, mutwele mu kipwilo, ne kunembesha jizhina jenu mu buuku. Nangwa kunyikai ne kwamba mba, ‘Namushimuna Kilishitu amba Mwaana wakwa Lesa,’ imana.” Diabola uba kintu kimo. Kyakine. Diabola wabatizhiwe kimye Yudas po abatizhilwe. Diabola waile na kusapwila Mamboawama kimye Yudas kyo aile na kusapwila Mamboawama. Pakuuba diabola kechi watambwile Mupashi Wazhila ne. Abyo byokiji. Amo momuji Bulume bwafyamika, alo lo lusanguko, abo bayuka mba ibyo, kwakubula ne kuzhinauka nangwa pacheche ne. Amena.

<sup>87</sup> Uji pano. Awa yeka umo Mupashi Wazhila, awa Yeka wajinga pe Mesiyasa, ukijitu pa Kipwilo Kyanji. Aye kechi ufumapo ne. “Amiwa nkekala ne anweba kimye kyonse, ne mwi anweba, kufikatu ne kupelo ya ntanda. Amiwa nkekala konka. Mingilo Amiwa yonguba, ne anweba mukeyuba. Ne yavula kukila paiye mukeyuba, mambo Ngya ku Ba Taata.”

<sup>88</sup> Pakuuba ntanda ibena kunekenya, “Oo, ao ke moba apita!” Ke byobya diabola byo akeba mba anweba muube. Bakeba anweba kwibiwamisha. Lesa aye ukeba mba anweba mubatizhiwe. Lesa ubena kwimukeba anweba...Anweba mwaamba mba, “Oo, Amiwa kechi naketekela mu byonse byo batwajijila-nakuuba ne.” Yaingatu kulutwe nakwikala, yainga kulutwe na kwikala mu bubu bwenu, ikalaitu mu bubu bwenu. Pakuuba kana mwabola, poso anweba mwabola ku milanguluko yenu anweba bene, poso anweba mwabola ku mafwashi enu, kabiji mwaikala basangululwa ne kusemwa jibiji, kabiji abwa Bumi bupya bukekala bwapusanakotu kufuma kubobwa bwapita.

<sup>89</sup> Jipeke ja jitaba jibyalwa panshi kasa jiji ja kibobo, pa kumena ke ja mazhamatanda. Jibyalwa panshi kasa jakosa, kasa javwetwa, jilupuka kasa janekena kabiji ne kutekeena na mwela. Oo, lukumo! Aleluya! Inge mwela watatula kupupa, jipeke kafwako byo jafwainwa kuuba ne kanatu kwenda ajo jiine, javiluka, pakuuba kacheche—kacheche kalubuula kekala kanekena kabiji kalusekelo, popa kukoma, ne kwikosesha ako keene. Kechi jakosha kwikala jibula kwakubula patanshi kufwa

ne kubola ne. Kechi kufwa kokatu ne; kana ne kubola. Kechi wakonsha kubwela jibiji ne, pakuuba bumi bobulupukamo.

<sup>90</sup> Nobe Monka monajikwambila kala, kusemwa ke kintu kyatama, kyabusaji, ndochi, ke kintu kyakila mubusaji, bino momuji bumi. Inge obewa mwine wiimona mba ne wabusaji, wiimona mba a Methodist, Baptist kabiji ne mafunjisho aki Pentekosito ke busaji, kabiji wafwa pa kitapisho, apo Bumi bupya po bwiyamo. Aye Mupashi Wazhila ukulengela kwikala peulu ya kyokyo; mwamona Lesa.

<sup>91</sup> Tukamumona Aye juba jimo ja lukumo. Juba jimo kukila pafwainwa kufika muntu wabumi, atweba tukamumona Aye. Mwaketekela kyokyo nyi? Juba jimo kukila pafwainwa kufika muntu wabumi, akwa kubena nkupembelela keesha wawama.

<sup>92</sup> Amiwa naimene popa pakoona bufuku bwapita, kabiji Nalangulukile mba namona Rabbi Lawson wamucheche. Kimye kyo atanwanga muno, kabiji wafikanga na mukombo wanji wakala ne kunkoka na shingo yanji, kuzhokolosha shingo yami na mukombo wanji, ne kwiya kuno ku pulupiti, kabiji ne kwimba yewa lwimbo, “Akwa kubena kupembelela amiwa . . .” [Kafwapo kiji patepu ne—Waku.] . . . ? . . .

<sup>93</sup> Kintu kimo kyamwekele! Kyafumishemo ntanda. Natatwile kumona bintu byapusanako. Amiwa nasakamana bingi namambo amobobila bantu bena America, kimye kyonse, mwaka pa mwaka, pakumona banabakazhi ne banabalume byobabena kwibwezha panshi bene kabiji ne kutwela mu bubi, poso Amiwa nashi kekale na lukatazho, bimye bibiji nangwa bisatu, nakusakamanatu pa kikye. Keesha, Naambile kwi Lesa, “Amiwa kechi kekalapo wasakamana jibiji ne. Kyambo Kyenu kyaambile mba byo kikekala byonkabyo. Bino Amiwa nkemanatu pakachi kabiji ne kwikizhachisha, nakyonse kiji mwi amiwa.”

<sup>94</sup> Juba jikwabo, byo naimene kokwa ku Green’s Mill, lukelo lwami, mwiine mungye, nalombelenga juba jonse. Kabiji pepi nobe fiili koloko, juba kasa jibena kuzhika, kabiji Naimene popa kasa tala kubushiya, nalupukile mu lukelo, naimana peulu ya jibwe. Kabiji Naimene ponkapa, kasa ntala ku Musela, na kutota Nkambo. Kabiji Namwene juba kasa jibena kuya nakuzhika mu binchi peulu ya mutumba, byo Natajilenga kubushiya bwa mitumba ikwabo, kabiji kwajinga mabula avula, kwajinga kwazhindamatu nzoo. Kabiji Naambile mba, “Nkambo, juba jimo Anweba mwamufile Mosesa mu lukelo lwa jibwe, kabiji Anweba mwapichile kwipi ne aye, mambo wajinga wakoka. Bino Anweba mwapichile kwipi, aye waambile mba ‘wamwekele nobe nyuma ya muntu.’” Naambile mba, “Mfyaitu amiwa mu lukelo, Nkambo.” Pakyonka kya kimye, kulubaji lumo lwami, kwaishile Mwela mucheche kasa abena kupupa mu bipupu. Kaendele kwiya, kaishile konka kulubaji lwami, Mwela

muचेचे waishilenga, wapichile mu binchi. Amiwa naimene byobya.

Juba jimo, Lesa ye yekatu wayuka kwepi  
 nangwa kimye,  
 Ng'endo ya bumi ikemana,  
 Nanchi Nkaya nakwikala ku mutumba wa  
 Ziona.

Juba jimo kakila pafwainwa kufika muntu,  
 Juba jimo, Lesa ye yekatu wayuka kwepi  
 nangwa kimye,

Kika kikamweka? Ukafika ku mpelo, ng'endo yonse ikemana.

Ng'endo ya bumi ikemana,  
 Nanchi tukaya na kwikala ku mutumba wa  
 Ziona.

Iyai pepi, kalaki wawama,  
 Kwiya na kusenda ku Muzhi;  
 Iyai pepi, kalaki wawama,  
 Kwiya na kusenda ku Muzhi.

Inge mwafika kokwa Amiwa kasa kyangye,  
 Kwiya na kusenda ku Muzhi;  
 Bulai Mulongo Bosworth, ne bonse balunda  
 naami, ne abo,  
 Nanchi kwiya na kusenda ku Muzhi.

Pano iyai pepi . . . (Ukekila panshi juba jimo na kusenda.) . . . kalak- . . .

(Kinchi kyonse kyonse kikapya; ba Malaika ba Lesa, bakalaki ba mujilo) . . . kwiya na kusenda ku Muzhi;

Iyai pepi, kalaki wawama,  
 Kwiya na kusenda ku Muzhi.

<sup>95</sup> Juba jimo jibena kwiya, juba jimo jibena kwiya mu kimye kya ma awala ami akufwa, Amiwa na Mupembelela kwiya. Abyo ibyo.

Natajile kubushiya bwa Yodano kabiji kika kyo Namwene

Kwiya na kusenda ku Muzhi; (nobe Elaija wakala kasa abena kutala pa bushiya bwa Yodano)

Jibumba jaba Malaika batoka babena kwiya kwi amiwa,

Baishilenga na kusenda ku Muzhi.

Iyai pepi, bweleshai panshi, kalaki wawama,  
 Kwiya na kusenda ku Muzhi;

Iyai pepi, kalaki wawama,  
 Kwiya na kusenda ku Muzhi.

<sup>96</sup> Aye Nkambo Yesu, wapeshiwa Dulaiva wa kalaki, Wendesha bwato bwakala bwa Ziona, bwato bwa Bumi, ubena kwenda monka mu kishimikwa, na kwamba, Kyeenyi Kyanji kiji muno. Awa yeka Mupashi Wazhila wa musangwile Aye kufuma mu kilende uji muno.

<sup>97</sup> Byokiji mba kechi baji kupanapo nangwa kitupa kya milombelo ne, mujipo umo muno wafuma mu tauni ungi, ao ye Nabula kuyuka, abo baji muno amba balombelelwe? Sutulai maboko enu, anweba ye Nabula kuyuka. Sutulai maboko enu peulu, Amiwa kechi nayuka ne. Anweba, anweba koko. Naketekela mulunda wamucheche uji na tomombo kokwa, muntu umo waji kusutula maboko kunyuma kululwe lubaji. Ee, obewa, waji kusutula kuboko kobe nyi? Kijitu bulongo. Kunyuma koko, anweba, mwane. Kijitu bulongo. Anweba bonse mwi benyi kwi amiwa? Awa Nkambo Yesu, Kafunga umo wajitanga muno, mwaketekela mba milaye Yanji ya kine nyi? Aye ushinga manyi kipwilo Kyanji, kabiji “Aya mingilo yo nguba Amiwa, mukeyuba, ne anweba. Ne yavula kukila pa iye mukeyuba, mambo Amiwa nkaya ku Ba Taata. Ne yakila pa iye!” Mwaketekela kyokyo nyi?

<sup>98</sup> Bushe mwaji kusutula kuboko kwenu amba mwangyuka nyi? Mwaketekela mba Lesa wakonsha kumbula kiji mumuchima wenu, wakonsha kwamba kwi amiwa byonka Aye byo aubile ku mwanamukazhi wakwachile ku kyakuvwala Kyanji nyi? Mwaketekela mba Aye ye Ng’anga Mukatampe ao wakonsha kukwatwa ku byalumanamo byetu nyi? Inge Lesa wakonsha kumbula musango wenu, anweba musa kuketekela mba amiwa ne ngauzhi Wanji, kuketekela mba Kyeenyi Kyanji kiji pano kabiji oene mambo Aye kyo ekiswishisha? Anweba mubena kulombelela bakazhi benu. Banji na kapole kamokoka, kapole kaselakana. Abyo ibyo. Inge kiji bulongo, sutulai peulu. Kijitu bulongo, yainga mukamutane, wakosa. Amena.

<sup>99</sup> Pano nga anweba koko kunyuma, mulongo mucheche wokusutula peulu, wajinga na tomombo? Waketekela na muchima obe yense nyi? Waketekela mba Lesa wakonsha nkumbula lukatazho lobe nyi? Waketekela mba mwananobe usa kwaikalatu bulongo? Mwaswa nyi? Uji na songwalume, uji na lukatazho kubongo. Abyo ibyo. Anweba kechi mwi. . . Mwafuma ku Kentucky. Inge abyo ibyo, sutula kuboko kobe. Amiwa kechi ne muyuka ne, ne Muyuka nyi? Inge Amiwa ne muyuka. . . Sutulai maboko enu *bibye*, kechi twiyuka umo na mukwabo ne. Abyo ibyo. Kuketekelatu kwi Lesa. Mwaketekela nyi? Byonka byo mwaketekela, katanayi songwalume wenu monka mo mwiketekela. Kibikaitu pa muchima wenu.

<sup>100</sup> Bang’anyi kukwe baji kusutula maboko abo, abo Amiwa kechi—kechi. . . Kyajinga anweba? Kijitu bulongo, anweba, bushe anweba mwaketekela mba amiwa ne ngauzhi wa Lesa? [Awa mwanamulume waamba mba, “Amena.”—Waku.]

Mwaketekela, na muchima wenu yense nyi? Anweba kechi mwakonsha kwimana ne, imanaitu ponkapo. Kijitu bulongo, mwane, lukatazho lwenu luka, anweba muji na kikola kya shuka. Kabiji kibena kukatazha ne kulu kwenu. Mwafuma ku Ohio. Jizhina jenu mwiba Mr. Miller. Bwelai ku nzubo mukekale bulongo. Kijitu bulongo, ketekelaitu na muchima wenu yense. Kijitu bulongo.

Mwaketekela na...? Mwikiketekela. Inge mwakonsha kuketekela!

<sup>101</sup> Bainetu baikala papo, mwajikusutula kuboko kwenu nyi? Bainetu babaya, mwamvwala magalashi, mwaketekela na muchima wenu yense nyi? Mwaketekela na... Mwaketekela amiwa mba kalume wakwa Lesa nyi? Mwikyuba nyi? Kijitu bulongo, inge Lesa wakonsha kumbula lukatazho lwenu luka, musa kuketekela nyi? Lukatazho lwa muchima. Kijitu bulongo, sutulai kuboko kwenu inge ibyo. Kijitu bulongo.

<sup>102</sup> Bainetu kukwe be mulondelapo, sutulai peulu. Muchima; bino kine kintu ke meso enu. Amiwa namuyuka. Kijitu bulongo, inge mwakonsha kuketekela!

<sup>103</sup> Kunyuma koko, mwanamulume walondelapo kunyuma koko uji na lukatazho lwa muchima, ne aye, kabiji ne kikola kya kikoba. Mwaketekela mba Lesa usa kwi mulengela kwikalatu bulongo nyi? Mwaswa nyi, mwane?

<sup>104</sup> Kuji mwanamulume kunyuma koko kuntu kumo, wakusutula maboko anji ajikubula... Mr. Schubert. Kijitu bulongo, mwane. Kijitu bulongo, mwaketekela nyi? Ke mambo ameso enu, ne ao, kechi ibyo nyi? Mubena kulombelela ba inenu baikala kokwa, ne abo. Inge abyo ibyo, sutulai kuboko kobe. Atweba twiibenyi. Abyo ibyo nyi? Imunai kuboko kwenu, imunai kuboko kwenu umo ne mukwabo. Kijitu bulongo, abyo ibyo. Inge mwakonsha kuketekela, mwakonsha kutambula!

<sup>105</sup> Wasanguka Yesu Kilishitu uji muno mu kishimikwa. Aye ye Umotu. Akye Kyakonsha kuba byepi kwi obewa? Mwaswisha ntanda mba ifumyemo bulume bonse mwi anweba nyi? Lukumo! Amiwa nakeba kusemwa kupya! Amiwa nakeba Bumi bupya! Amiwa kechi nasakamana ne nangwa Eye nang'anyi ndeke, inge Amiwa nafwainwa kwikala uba kyongo kyazhila, kiji kyonse. Amiwa kechi nasakamana ne nangwa Kwiye mung'anyi ndeke, Amiwa nakeba mwine Mupashi Wazhila nobe uji pe amiwa ponkapano. Amiwa nakeba Kumulama! Amiwa nakonsha kutemwa kwikala Nanji kukila pa bintu byonse bya muntanda. Amena! Mwaketekela nyi? Bushe mwaketekela mba Aye uji muno nyi?

<sup>106</sup> Tetekai maboko enu umo pa mukwabo, nanchi. Mbulai kintu kimo kikwabo Aye kyo akonsha kuuba. Kafwako ne. Ikalai na lwitabilo pano. Ketekelai mba kwapwa.



107 Nkambo Lesa, Mulenga wa Meulu ne ntanda, Nsulo ya Bumi bwa Peenape, kabiji ye Upana bya bupe byonse byawama, Mupashi Wenu uji muno na kushinga, Nkambo, kibena kumweka nobe kishimikwa kibena-kupeema, kasa kyenda kuya kulutwe ne kunyuma. Kika bantu kyo bakonsha kubula kwikyumvwa, Nkambo? Bushe ba—bushe ba kwatakana na ntanda kimye kyabaya bingi, kabiji kibalengela kwikala bamunyango ne ba byokabyo kabiji bakosakana, poso babula kwimuyuka Anweba ne jikwabo nyi? Nkambo Lesa, lekai abwe Bulume bufikile pa muntu uji yense, kabiji yense wakolwa atambule lubuko, yense mubi ampuluke, kabiji Lesa mutambule lukumo. Kupichila mwi Yesu Kilishitu, Mwaana wakwa Lesa, Amiwa ne kipuzha. Amena.

108 Mwikiketela akyo nyi? Sutulai maboko enu. Mwaketekela lubuko lweni nyi? Lesa emupeshe. Pano yainga mukatane byonka byo mwikiketekela, kikekala byonkabyo. Amiwa namona bimwesho ke bimweke pa bantu bakwabo. Abyo ibyo. Nafwainwa kubwela jibiji bufuku buno.

109 Inge kechi mwaketekela pa kino kimye ne, anweba kechi mukaketekelapo ne. Abyo ibyo. Yesu wikyubilepo kimye kimo, kabiji baambile mba, “Anweba yenu . . . Atweba twayuka inge Mesiyasa waiya, Aye uketubuula bibye bintu.” Aye waambile mba, “Nayuka mba Mesiyasa ukoba byobyoy. Pakuuba Obewa Yobe nyi?”

Aye waambile mba, “Amiwa yami Iye.”

110 Ponkapo aye wanyemejile mu muzhi na kwamba mba, “Twayai, mukamone Muntu Ao wayuka byo Najinga kabiji ne byo Nauba. Bushe awe kechi ye Mesiyasa nenyi?”


111 Aye waambile mba, “Abye bintu bikobiwa jibiji mu moba akupelo. Akyo Kipwilo kikasapwilanga Bukine, Kikemanatu pa Kyambo. Kikobanga Mizhilo yonse ya Lesa. Kechi kikakwatakana na ntanda ne. Kabiji monkamwa Amiwa kapita mukachi kabo ne kuba bintu bimo.”

112 Pakuuba Aye waambile mba, “Bakekala ba kwitota, bakwilundumika, bakutemwa kisangajimbwe kukila byo batemwa Lesa, bakubula kuzhila, bakwibapela bakwabo, kasa baji nakipashang’anyatu kya bwina lesa,” babupopweshi bingi, kuya kubipwilo. “Kasa baji nakipashang’anotu kya bwina lesa, bino Bulume bebukana. Babyobyoy kwibalondela ne!”

113 Anweba bantu, konse komwajinga mu kipwilo, aba Boajikwita ponkapano, kimwesho kyafumapo pe amiwa. Inge—inge akya kyajinga kya bukine, byo Najikwamba, kabiji amiwa kwakubula kuyuka kyokyo kwi anweba sutulaiko maboko, sutulaiko maboko enu, yense ye kyajikubilwa. Monsetu mwaya kipwilo, yense—yense muntu. Kijitu bulongo. Mwamona? Kwakubula kwibayuka, kwakubula kwibamonapo; pakuuba aye

Mupashi Wazhila uji muno kabiji Wibayuka. Kechi mwamonane amba kechi kyajinga amiwa ne?

<sup>114</sup> Telekai! Inge Aye wakonsha kupana mu maboko ami bibye, Aye wakonsha kupana ne kwi amiwa Bukine bwa Kyambo, mambo Bukine bwakonsha kwi yatu kupichilatu mu Kyambo. “Lapilai, anweba bonse, kabiji ne kubatizhiwa mu Jizhina ja Yesu Kilishitu, mu lulekelo lwa mambo, kabiji mukatambula wa bupetu Mupashi Wazhila, mambo mulaye walailwa anweba ne baana benu, ne bonse baji kwalepa, ne bonse mobavujila Nkambo Lesa wetu boaketa.” Mwikiketekela nyi? Kusa kwikala lubatizhilo lwa mu meema mu kakimye kachechetu.

<sup>115</sup> Twayai tukunyike mitwe yetu. Nsawkwipuzha ba kafunga balombe mu kimye kyo babena kwinengezha bya lubatizhilo. Naketekela mba kuji lubatizhilo lwa mu meema lubena kwiya. Kijitu bulongo. 

*KIPWILO KYAJIMBAIKWA, KU NTANDA* KDE59-0628M

(A Deceived Church, By The World)

KIPWILO NALUFUNJISHO LWALONDANKANA

Ino Mbila na Mulongo William Marrion Branham, yalupwilwe patanshi mu Kizungu pa Mulungu lukeelo, Kapyatoto 28, 1959, ku Branham Tabernacle ku Jeffersonville, Indiana, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2022 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)